



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

10. Kalenderwoche – ab 5. März 2011

Wassorkobb!

Isch gloob, isch grisch irschenwann eene Griese - was dähn Arbeitsmargd bedreffn dud! Seid Jahr un Daach ham mir doch jede Menge Arbeitslose - also, ausbeudungsfreie, sachd meine Gudste!

Von Harz viere dun 4,7 Milljohnen lähm.

Jede neue Regierung dud schwörn, dass soviel wie meeschlich Leide widdor in de Ausbeudung zurigbring will! De Regierung vom Gerhard Schreedor is ja unnorgegang, weil se de Senkung dor Ausbeudungsfreiheid vorschbrochn hadde, abor dann nischd zuschdande gegrischd had. Schwubs, da war dor Schreedor weg vom Fensdor.

Un nu heere isch andauornd, das dor Arbeitsmargd geredded wern muss. Es dädn Fachgräfde fähln. Ausländor missdn schnellsdens reingehold wern! Ja, nisch Ausländor raus, sondorn Ausländor rein!

Was is denne da los? Sinn denne die 4,7 Milljohn Ausbeudungsfreien alle welsche, die de im Brodugdjohnsbrozess nisch vorwendn kannsd?

Wenn das alles solsche mid zwee linke Bfodnsin, asozial un bildungsfern... warum sachd mor denne das nisch? Warum wird denne dann immor so gedan, als wie wenn mor die in dähn Brodugdjohnsbrozess widdor neinbring kennde?

Missde mor nisch sachn - es dud ehm immor welsche gähm, die kannsde nisch vorwenden - die lassn sich nisch ausbeudn... - ausbeudungssissidend, sachd meine Gudste!

Das kammor doch zugähm, wennis so is!

Isch hab ja ooch een Kumbl, also dähn kenn isch vom Fußballbladz hähr... wennisde dähm sachn dädesd, dähr soll am Gombjudor e Brogramm offmachn, dud dähr sein Flaschneffnor aus dor Dasche hohln. Odor een Gorgnziehor! Die Gerähde zum was offmachn, had dähr immor am Mann.

Nee, dähr is werglisch fiehr de Ausbeudung ziehmlich ungeeischned.

Wobei... friehor hammor solsche un annre Leide, die de im Brodugd sjohnsbrozess nisch eingesdn konndesd... also, die hammor irschendwie annorweidisch beschädischd. Jedor volkseische Bedrieb hadde da so beschdimmde Bosdn... in dor Delefohnzendrale, odor im Lachor, in dor Vorwaldung... un jede Brigahde hadde een Bambl, dähr de Baubude saubor machn dad un das Bier gehold had. Dann de haubdamdlischn Sesslbubor von dor Bardei, von dor FDJ, DSF... Weddbewerbsbeoffdrachde, Fraunbeoffdrachde... - irschendwie hamm mir die mid de zwee linkn Bfodn un eim IQ unnor dor Meßbarkeidsgrenze... die sin alle in Lohn un Brod gewähsn! Heide sin solsche ehor in Hohn un Kod! Naja, is doch werglisch e Hohn, wenn de von Harz viere lähm mussd! Nee, dazumals hadde jedor Bedrieb sein nischbrodugdiefn Bereisch - een ordndlischn Wasserkobb!. Dähr dud ehm heidzudaache fähln. Dor Gabidalisd dud bloß offn Brofid guggn, sachd meine Gudste. Mid Wasserkobb däde dähr schnell badn gehn, gloob isch. Diesbezieschlich is ehm dor Sozialismus doch schdärgor gewähsn!

Eduard Sachsenmeyer